

Kayëte nte kerëhnëkëhni Pol vëvë Efes Wade yehëhna hnë inji kayëte

Afayik Pol hërëhnëkëhni anji kayëte vële hwëtahnëk hnë nkol Efes hna. Bare vikerëh vicër vindaw hn'iji kayëte nësëna sojë Efes. Mpëd umë ÿak kayëte ñi cahini vëvë vacery sali vajabah vamb nkal Asi Toy va fop. Anjiko Efes hna wati nte njasëdëho nkaŵ ntëwu kigëna ña (Vantiyehn 18-20) do wati nte mbokako rarëna ña añëwëko hnam wabëhn watar. Akerëk mpëd wati nte nkeho hnë kaso mbë Sesare (yëbëlan bëhn wafëhw imbëd gë warar gë bëhn wafëhw imbëd g'imbëd gë warar (53 gë 58) ga ndëcëk hnagi Yesu ÿa) ma hnë kaso mbë Rom (yëbëlan bëhn wafëhw imbëd gë rywã gë bëhn wafëhw imbëd gë rywã gë wahi (60 gë 62) ga ndëcëk hnagi Yesu ÿa).

Pol kerëk anji kayëte gante ndënkwëtehnahnëdëhëhni vële hwëtahnëk va bi vëhni mo yeyinëk paß gë Këris. Fop kayëte ñi nësëd ibëmënkël fu gë Këris ña do karañëdëhëfu ibank nte rëfëka kwëhnalín gë umë. Iyir Ipacah ña ryemadëhëfu ñahnëlënden do maŵëhnëlënden: ten ŵasëwif ŵa gë vële wok vëyena wasëwif, tac yëbëlan fop vële hwëtahnëk hnë cery sali va, yëbëlan vësëval gë vësan hni, vutah gë warëm hni do gë vëramp gë vële hwëhnëkëhni.

Pol nēsēd soṅe doku Sintani ale yēkēlehnēd tavētehnēni vahnē va inḡi bēmēkēl. Akaranēdēhēfu hak mētaryēden iḡi wēt hn'ile njēdadēhēfu Wēn viwēta: toña, usatah, fanka pēyahḡ Wanēs Wakasēk, ikwētahn, ipēh. Antehnēdēhēfu njēfayin wati-wo-wati.

Wēlin wanēs wakwēhn nafa hn'inḡi kayēte: uyas, ile sowīko, fanka.

Wēlin gante nke kayēte ka:

Simpaḡi (1.1-2)

Ibēmēnkēl wasēwif gē vēle wok vēyena
wasēwif Kēris hna (1.3-3.21)

Ibēmēnkēl bulunda vēle hwētahnēk hna (4.1-
6.9)

Ibēmēnkēl vēle hwētahnēk

Wēt ikwētahn (6.10-20)

Simpaḡi rēkwa (6.21-24)

Simpaḡi

¹ Ami Pol, ale ye afayik Yesu Kēris kabi Wēnu ḡa ḡak koyēna, kerēhnēdēmu wūhnē vēfacah do vēle hahnēndahnēka Yesu Kēris:

² Arabi Wēnu ḡa, Rēm fu ḡa g'Ahwēhn a Yesu Kēris ndēwanihu do njēdēnihu yam ḡa!

³ Cēmbēnēfuna ale ye Wēn gē Rēm Ahwēhn fu ḡa Yesu Kēris! G'ibēmēnkēl fu gē Kēris ḡa ndēwak vintaḡary vidēw fu va gē fop wadēwara wadēwu wade wātik mbin hna.

⁴ Ani gē ntihahnēnd dūniḡa ḡa Wēnu ḡa rēko tēhnafu, g'ibank fu gē Kēris, danko nkehahnin vēfacah do vēle wok vēhwēhnana dahēse wēh haryēnkwa lēwu.

Hnē inḡahn hna,

⁵ rëko tëhnafu nkeyin vërahu gë fere ibank fu gë Yesu Këris. Rac ye ile ñadëho Wënu ña do pëhnako nti

⁶ d'anko cëmbinëhna soñe ipërëna camah dëwu nte njëdakëfu aki fo hn'ibëmënkël fu g'Aju aÿahnik a!

⁷ Hn'ibëmënkël fu hna gë umë, gë sat lëwu ÿa pehëtinëkëfu, tavëhninëkëfu wameh fu ña. Aki Wënu ña tufahnëk had gante naÿëk ipërëna dëwu ka.

⁸ Njëdakëfu d'us ipërëna tac do ntik rac gë fop yasery do hakili fërën.

⁹ Ha, njëtëndanëkëfu ile ñadëho ÿa, ile soÿiko ÿa, ile pëhnako, hnë përeña dëwu hna, nti hnë Këris hna.

¹⁰ Ile pëhnako ÿa ntiyehnëd ge wati ÿa padëk: rac ye barëp hnë asankaf aryampo fo, Këris, fop vile yehëhna mbin hna do nkal hna.

¹¹ Hnë ibëmënkël fu hna gë umë, nuÿabun lëw fu ÿa, gante pëhnako Wën ka. Rëkëd ntind fop kabi pëhnako do ñak koyëna

¹² d'anko icëmb ntëwu ña njëwi soñe fuhnë vële ryënkwek hwëtahnëka Këris va.

¹³ Wuhnë fëna, ante nkwëryërun wanës toña ña, Wanës Wakasëk wante fehëtëku ña, kwëtahnërunëha. Hnë ibëmënkël hun hna gë umë, wuhnë fëna njëdayirun iyavëta ile ntëhnëkuno njëdadëhu ÿa, iyavëta rac ye Iyir Ipacah ña.

¹⁴ Umë ye sah ryënkwëryënkwe hnë idëw nte hnapëden hafo nuÿayin fop ile ntehnëko Wënu ña njëdadëhëfu. Iÿin fop soñe icëmb ntëwu ña njëwi ye.

Iyëfa Pol soŋe vëvë Efes

¹⁵ Soŋe rac ye, ami fëna, kobëri ga nkwëryëbu ga nësëde soŋe ikwëtahn hun ɲa hnë Ahwëhn fu Yesu do ɲahn hun vëfacah fop ɲa,

¹⁶ camehnëdëfuha kwëlëkwël Wënu ɲa soŋe hun ŷa. Anahadëmu wayëfa mën hna.

¹⁷ Tëyëdëfuha Wën Ahwëhn fu Yesu Këris ŷa, Rëm le hwëhnëk icëmb ɲa, njëdäwu iyir yasery g'itufëhnahn nte yëtëndanëdëhuna Wënu ɲa.

¹⁸ Tëyëdëfuha ntancën wahakili hun wã gë humpen Iyir Ipacah ɲa, soŋe ayëtu itama nte njëdaku imac ntëwu ɲa, g'uvetak icëmb ntëw dëwu ɲa, antëw nte cahëdëhu gë vëfacah vëyëntaw va,

¹⁹ do gë fanka samah lëwu soŋe fuhnë vële hwëtahnëk va. Fanka farac ye fale

²⁰ vokaryika Këris fagant vësëm do ntañënda farëhw lëwu hnë mbin hna,

²¹ cëpëk inaw ɲa fop, cankaf, fanka, gë fop uwëka do fop wamac wale hode maci hnë iŷi duniŷa bare fëna duniŷa ile yejëk ŷi.

²² Ha, Wënu ɲa hwëtëk fop hnë wakwër Këris hna. Umë ale sëpëk fop, Wënu ɲa njëdahnëka nke nkaf Cery Sali ɲa.

²³ Vële hwëtahnëk va ye mbahn Këris ɲa, do Këris hnë vëhni ntëdëk; padënekëhni fop, umë ale fadëned fop.

2

Uwám ule njëdahnëd Këris

1 Do wũhně, kobëri ña mawëhñeluhnahna Wënu ña, walaŵary hun wã cëmëko soñe wameh hun

2 wante yasahnëdfunëho kobëri ña. Atëfëtalahnëdfun vantiyehn vahnë vële ye duniŷa li. Amaŵëhñëdfunëhawo asankaf wafanka waŵeh wale ye ambin. Aŷi asankaf ye iyir meh ale ryokuñëf aki hnë vële wok vēŵawëhñëdfilahna Wën va.

3 Fuhnë fop nkeyinëko had vēhni, ankontinëkëfuno gante ñađ ikihn vahnë nte watik hnë mbahn ka, antidenëho gante ñađ vimbahn fu ka do wahakili walëŵ fu ka. Soñe ile yeyinëko ŷa, akëbëñayehñinëkëfuno korotin kitij Wënu ña had vēŷëntaŵ va.

4 Bare Wënu ña, soñe ikaŷëhñahn cankaŵ ntëŵu ña g'ijahn cankaŵ nte ñahnëkëfu,

5 fuhnë vële sëmëko gë wadënt wadëŵ fu ña, njeđakëfu uwám wã gë Këris ŷa —ipërëna Wënu ña fehëtëku.

6 Hn'ibëmënkël fu gë Yesu Këris hna, mbëhñëndehñëkëfu ndampo fo do ntañëndëkëfu mbin hna.

7 Koyëna ntik đanko tufëhni vahnë vēvë cahn va ipërëna camah g'uhnëfak ule kwëhñahnëkëfu hn'ibëmënkël fu gë Yesu Këris.

8 Kabi, g'ipërëna Wënu ña pehëtirun, gë fere ikwëtahn hun. Rac matina hnë wũhnë, uyëđ Wënu ña ye.

9 Rac matina hnë vantiyehn, đanko ahñë antë kumanënd.

10 Ha, umë yahanëkëfu; hn'ibëmënkël fu gë Yesu Këris, antikëfu đanko ntihahnin vantiyehn

vapërën vante këbënanëhnëkëfuno kobëri ña Wënu ña, ðanko njasënden koyëna.

Fop mbëmënkëlinëk gë Këris

¹¹ Soje rac, ðënkwëtaryin wani: kobëri ña, wühne vële wok geluhna wasëwif hnagihna; wasëwif wã macëðënihu vële wok «vëhácina» vëhni mëcadëni vëhácik soje ile ntik vák ahne mbahn ðëw hni hna.

¹² Hne wati rac ñawërunëhawo Këris, gentahnilunohna gë bulunda Isërayel ýa, vëhneh yerunëho hne vakwëtëla gë Wënu ña, nkerunëho ðuniýa li gë itamahn këm do gë Wën këm.

¹³ Bare gaki, soje bëmënkël hun gë Yesu Këris ýa, wühne vële yeho kobëri ña ñawët, sat Këris ýa pañëndajëku.

¹⁴ Ha, umë ðënk ye yam lëw fu ýa: mbëmënkëndëlehnëkëhni wasëwif gë vële wok vëyena wasëwif. Apërëkanëk kece ile fitëndëlehnëkëhniwo ýa: kece rac ye iñëwël. Gë sadëha mbahn ðëwu ña

¹⁵ sariya ýa g'ile tëyëk ýa gë vakwëða vantëwu va goryaryëlohná nafa. Antik aki gante kod ntihahn hne umë wasëwif wã do vële wok vëyena wasëwif, ahne hasëk aryampo fo, do koyëna nti yam ýa,

¹⁶ do konjëndëlehnëhni gë Wënu ña vëhni vëhitak hne mbahn ndampo fo, g'icëm ntëwu kërëwa hna do koyëna ndaw ñëwël ña.

¹⁷ Anjijëk pëyawu yam ýa wühne vële ýawëko va gë vële rëhako va per.

18 Kabi, hnë bëmënkël fu g'umë hna, fuhnë fop, wasëwif gë vële wok vëyena wasëwif, kodën pëjayinëhna Rëm ÿa, hnë Yir ndampo fo.

19 Aki, goluhna vëhneh ma vële ryëcalëd; bare nkentahnirun hnë bulunda vëfacah hna, wuhnë ye tere Wënu ña.

20 Nkerun cery yëryik do vëfayik va gë wakila ña ye sah ryënkwëryënkw ÿa, do Yesu Këris umë dënk taka ndënkwëryënkw ye.

21 Hnë umë cery ña fop njawënađ do matëndad nke cery pacah hnë Ahwëhn.

22 Hn'ibëmënkël hun hna g'umë, wuhnë fëna, nkerun ndampo fo cery nte yëryëde soñe ayewu ÿëwa Yir Wënu ña.

3

Doku Pol paß gë vële wok vëyena wasëwif

1 Soñe rac njëfadëfuha Wënu ña, ami Pol, ale sëd'ik kabi d'oku Yesu Këris ÿa lidëfu, d'anko ryemahnu wuhnë vële wok geluhna wasëwif.

2 Akwëtahnebu paryi nkweyërun d'oku ile kwëtehahnëko Wënu ña liwu, hnë fërenak lëwu hna, gante kod ntinëhahnu ile ñad ÿa.

3 Ha, Wënu ña pidëteko vinkër va soñe njëtëndano ile ñad nti sow'ik ÿa, had gante kerëhnëmu ki gë wanës wante wok yabëna.

4 Age karanjërun rac, kodun ahamahnu hafo bi ne njëtëbu ile sow'iko do ntik Wënu ña Këris hna.

5 Kobëri ña, Wënu ña tufëliw'ohna vahnë va iñin ile sow'iko. Bare gaki antik Iyir ña tufëhni vëfayik vëfacah vëlëwu va do gë wakila wadëwu ña.

⁶ Wëli ile pëhnëtanëk viyë vile soŵiko va: gë fere Wanës Wakasëk ña, vële wok vëyena wasëwif va kwëhnani antëw̃ ndampo fo gë wasëwif w̃a, nkeni mbahn ndampo fo do nkentahnini ndampo fo hnë ile ntehnëko ntinëhnëdëhëhni hn'ibëmënkël ntëw̃ hni gë Yesu Këris hna.

⁷ Wënu ña, hnë ufërënak lëw̃u hna, g'antiyehn fanka falëw̃u fa, njëdako yewu aryokuñëhn Wanës Wakasëk.

⁸ Ami, ale ỹak vak hnë fop vëfacah hna, nuyabu untënah fëyaŵuhni vële wok vëyena wasëwif va uvetak va Këris le wok pudina

⁹ do yëtëdanëw̃ëhni vahnë va fop gante ntiyëhnëdë Wënu ña viyë vile pëhnako nti do soŵiko koßëri kantëm hnë umë, ale liko fop vile ye va.

¹⁰ Do ntik rac, danko, gë fere cery sali ña, fop vële hwëhnak cankaŵ do w̃ëka ambin hna mëk njëtëni usery Wën gë fop wasifa walëw̃u w̃a.

¹¹ Hnë vëyin fop tëfëk nahan mbë kantëm ntëw̃u nte ntiyëhnëk hnë Yesu Këris Ahwëhn fu ỹa.

¹² Hn'ibëmënkël fu gë Këris, gë fere ikwëtahn fu hnë umë, koden pëñayinëhna Wënu ña g'idëkëna fop.

¹³ Soñe wañi fop, muntadëmu, antë aresaŵu wahorot wale horotëdëfu soñe hun; umë ye icëmb hun ña.

Uyëfa soñe vëvë Efes

¹⁴ Soñe rac ye andëkwëhnëdëfu haryënkwa Wën Rëm,

¹⁵ ale yëdahnëk wãc watere wabë g'ambin gë nkal.

¹⁶ Ha, atëyëdëfuha njawënu gë fanka mbery hun hna gë fere Iyir ntëwu ña, had gante naÿëk uvetak icëmb ntëwu ña.

¹⁷ Koyëna, Këris ntëfëk hnë wasakahn hun hna gë fere ikwëtahn ña, afëlu vënkahn hun va do ayëru fop uwám hun wã hn'ïñahn hna,

¹⁸ akwëhnadun aki fanka awëryahnu, gë fop vëfacah va, ile ye iyank, iyáry, iyihn do itëw ññahn Këris ña.

¹⁹ Ha, ayëtu ññahn Këris ña nte ryëcëtað fop uyët, ðanko ayewu vëfadah had gante padëk Wëñ ka.

²⁰ Wënu ña, gë fanka falëwu fale ryokuñëð hnë fuhnë, kod nti ntëbi vile ryëyëðenëha va ma vile hnahaðen va,

²¹ icëmb ña nke gë umë hnë cery sali do hnë Yesu Këris hna, soñe walape wã fop, dol do gë kantëm. Amina.

4

Imac bëmënkël hnë cery sali

¹ Soñe fop vëÿin ðënk, ami, ale sëðik kabi ðoku Ahwëhn a lidëfu, ankaÿëtaðëmu: yasëryin had gante macëku Wëñ ayasëndu.

² Geryin vële wok vëhumadina, vënëñah do vëryuñënak; mënkwlëryin ññahn hna.

³ Kamënaryin aworyeru bëmënkël nte wãtik Yir hna gë fere yam ÿa.

⁴ Mbahn ndampo fo do gë Yir ndampo fo yehëhna, do fëna Wënu ña macëku ahwëhnawu tama ndampo fo;

⁵ Ahwëhn aryampo fo, ikwëtahn ndampo fo, yaryi ryampo fo;

⁶ Wën hu dampo fo do Rëm fop, ale sëpëk fop, fagant fop do hnë fop.

⁷ Ale-wo-ale nuÿak ipërëna Wënu ña had gante yëdahnëk Këris ka.

⁸ Soñe umë ye ntehnik Vikerëh hna:
«Kayëk yañ,

anjokëhni vëfëlayik,
njëdakhëni wayëd vahnë va.»[☆]

⁹ «Kayëk», ye pëhnëtanëk, ge gena cëlik fëna hafo gëd nkal li?

¹⁰ Ale sëlik ÿa, ye ale hayëk cëmët fop vambin vi, danko pëbënahñ fop.

¹¹ Do wayëd wale njëdakhëni vahnë va ye: vëfayik, wakila, vëfëyahñ Wanës Wakasëk, vëharañ do vële herydëhëhni vële hwëtahnëk,

¹² danko këbënahñinëhni vëfacah va gante nti-hahnëdëni doku soñe njawënahñëni mbahn Këris ña,

¹³ hafo mëkin tükënin bëmënkël kwëtahn hna fop ndampo fo do hnë uyët Ajë Wënu ña, untaf hn'ikwëtahn, do inaÿ padah Këris.

¹⁴ Aki godenëhna had vutah, vunte mpaloyëd wavonkëlo wënka do vile këryëd sël fop wasifa karëña, vunte tokani vahnë va soñe cëvehñënihëhni hn'idënt.

¹⁵ Bare, ge nësëbun toña ÿa g'itufahn ñahnël ña, anayëden hnë fop danko mëntëlahñin gë Këris, ale ye nkaf cery sali nte ye mbahn dëwu.

¹⁶ Hnë umë, mbahn ña fop kahnëk do mbëmënkëlëk d'us g'uryema wasokël wale

[☆] **4:8 4.8:** Wahnëw 68.18

njēdfayik. Aki ge cape-wo-cape nke gante tēfēka ka, mbahn ija fop naŷēdf do njawēnad hnē injahn hna.

Uwám hasēk hnē Kēris

¹⁷ Wēlin doliyi ile lehnēmu do muntamu gē fanka wac Ahwēhn: antē avok ayasu had gante njasēdēni vēle wok vēyena wasēwif: vinahan vidēw hni va kwēhnana nafa.

¹⁸ Vinahan umēhweryah kwēhnani, do vēhneh nkeni hnē uwám Wēn hna, kabi wahakili walēw hni wā pidak do kambēkēhni vankaf.

¹⁹ Vintawary vidēw hni va nke had wēbák wadēndah, ndakēdēni gē ale-wo-ale do njēdēhnani sifa fop vantiyehn vameh.

²⁰ Bare wūhnē, gena aki nējarun ayētuna Kēris,

²¹ ge paryi nke nkweryerun ga nēsēde wadēwu, do karanjirun ikaranj nte rēfēlěk gē toña nte ye hnē Yesu:

²² ha, kobēri ŋa, pēbēkuno viña toka nte fērēkahnēdēhu, bare, ile yerunēho kobēri ŷa, tēfēka asudētawu had viyi visēr.

²³ Afo wahakili hun wā gē wasakahn hun wā nkwēcēta,

²⁴ do ayewu vahnē vēhasēk had gante cudjarun viyi vihasēk ki. Ahnē ahasēk arac Wēnu ŋa nahanēka mēntēlēni g'umē hn'usatah gē hn'ufacah ule wātik toña hna.

²⁵ Soŋe rac, cudētaryin wamēr ŋa: ale-wo-ale nēsēhnēnda toña ŷa aŷēntaw ŷa, kabi mbahn ndampo fo yentahninēkēfu.

26 Ntavëku bi? Antë aliwu wameh; ntavah hun ɲa tēfēka njam ani gē njohan lav wã☆

27 soɲe antë ayēɗawuna Sintani ŷa fere fale mēkahnēɗehu.

28 Arabi ale ŷa antë mbok nte; ɗokunēɗ gē wēbák wadēwu ɲa dēnk soɲe nuŷahn ile njēɗadēha ale ye hnē uval hna.

29 Antë cahn hnē wēs hun wanēs wameh, nēseryin wante ryemaɗēhēhni vēŷentaŵ wēbal wadēw hni hna, soɲe ntihahn ufērēn hnē vēle hnēpaɗēhu va.

30 Antë ayēwēhnehnuna Iyir Ipacah nte njēɗaku Wēnu ɲa had yavēta ile rufahnēɗ pehētēɗerun Fac Fehēta hna.

31 Antë ahwētawu hnē wasakahn hun wameh wante liyirun ɲa. Antë ntavēndu, njabu sakahn, ayewēndu; vēŷin fop tēfēka asuɗētawu, gē fop wasifa wayap.

32 Tufēhnaryin vēyivah ale-wo-ale gē aŷēntaŵ, kwēhnaryin ntaŵary pērēn; tavēhnēleryindēn, had gante tavēhnēku Wēn hnē Kēris.

5

Umēhwēry do Humpen

1 Ha, tēfētalahnēryina Wēnu ɲa, kabi vutah vunte ŷahnik yerun;

2 yasēryin g'ɲahn had gante ɲahnēkēfu Kēris ka do umē dēnk njēɗēhnak soɲe fu, had uyēɗ do saɗēha ile hwēhnak icēv nte nēɲēɗēha Wēnu ɲa.

☆ 4:26 4.26: Wahnēw 4.4

³ Wënu ɲa hwëhnëku, tëfëlahna dënk nkwëryi ga nësëde viyë vëryampo fagant hun: ndakëntal meh ɲa, fop ile wok pacëna, uval dëcët.

⁴ Tëfëlahna fëna nkwëryi wanës wante sëfëhnayehnëdëhu, wanës wanënkwah, ma wanës watonkah. Waɲi fop kwëhnana yëwë ya ɲal hun hna. Bare tëfëka awëryëhniwu icamehn Wën.

⁵ Nkwëryëryin dus: vële lid ndakëntal meh va, ma vële lid vironkah va, ma vële mbalëk dëcët va —vëhni, ɲahnënihëhni wamën wamër — vëhni vëhnuyântëdëna ntëw Inaw Këris do Wënu ɲa.

⁶ Ahnë antë tokawu gë wanës wante wok kwëhnana nafa: watac ye wante yojëd ntavah Wënu ɲa hnë vële wok vëwawëhnëdëlahna va.

⁷ Antë ayentahniwu gë vëhni.

⁸ Kobëri ɲa umëhwëry yerunëho; tame hn'ibëmënkël hun gë Ahwëhn humpen yerun. Yasëryin had vutah humpen;

⁹ do vantëwël humpen ha ye: ufërën, usatah, gë toña.

¹⁰ Kamënyarin ayëtu ile hnëɲëdëha Ahwëhn a.

¹¹ Vantëwël umëhwëry kwëhnana nafa; antë ayentahniwu; tufahnëryin.

¹² Wante ntidëni cowaryëdëni ɲi cëfëhnëk nësi;

¹³ bare fop vile rufahnik gë humpen ha cowëtak,

¹⁴ kabi fop vile sowëtik va humpen ye. Soɲe umë ye ntehnik:

«Nëgary, wëjë ale ryakëk,

matëry fagant vësëm,
do Këris ntancëndëhi.»

¹⁵ Yasëryin wajira gë vankeya hun va; antë ayewu vële wok vëseryëna bare geryin vëseryah;

¹⁶ Balëtahnäryin mpëd nte njëdfaku Wënu ña, kabi wafac wale yehahninëk wï mek.

¹⁷ Awa, antë ayewu vële hnambëk hakili, bare kamënarÿin ayëtu dÿs ile ñaryaryëdfëhëfu Ahwëhn a.

¹⁸ Antë aryëwü, umë yodëhu ayehahnu vëyeyar, bare geryin vële pëbëk Iyir Ipacah ña.

¹⁹ Kamënaÿehnlëryin gë wahnëw wale watik hnë Vikerëh hna, wahnëw sali wasëvah, wahnëw wale njëdfaku Iyir ña; yëwëhnëryina do cëmbëryina Ahwëhn a gë fop ntawary hun ña.

²⁰ Camehnëryina Wënu ña Rëm ÿa wati-wo-wati do soñe ile-wo-ile gë wac Ahwëhn fu Yesu Këris.

Nkwëryëla mbë tere

²¹ Mawëhnlëryin ale-wo-ale, wühnë vële lënënëka Këris va.

²² Vësëval, mawëhnëryinëhni vësan hun had gante mawëhnerunëha Ahwëhn ka.

²³ Ha, asan a ye asankaf asëval a, had gante nke Këris asankaf cery sali, umë ale fehëtëdf cery sali nte ye mbahn ntëwü.

²⁴ Had gante cery sali ña mawëhnedëha Këris ka, vësëval va fëna mawëhnedëfënihëhni vësan hni va hnë fop.

25 Vësan, ñahnëryinëhni vësëval hun va had gante ñahnëk Këris cery sali ka do njëdëhnak umë dënk soje lëwu;

26 añak aki pacëna gë wënka do gë wanës nkehahn afacah;

27 añak aki njoj cery sali ña haryënkwlëwu hnë igwam dëwu hna fop: nte wok kwëhnana dahëse wëh, nte wok kwëyana, nte wok kwëhnana ile wëntëlëk gë virac. Añak cery sali ña pac hara kwëhnana ile keyande.

28 Asan a aki tëfëka ñahna asëvalu ÿa, had gante ñahnëk mbahn ntëwu ña dënk. Ale ÿahnëka asëvalu ÿa, ñëhnak umë dënk.

29 Ahnë gena ale ÿewëk mbahn ntëwu ña, bare ndavëdëha, do pëladëha, had gante ntid Këris cery sali ka

30 kabi mbahn ntëwu yentahninëkëfu.

31 «Soje umë ye, asan a tavëdëhëhni rëmu gë hnëmu nkeni g'asëvalu fo, do vëhni vëhi tak aryampo fo nkedëni.»✧

32 Hnë wanës watac coŵak toña sankaf: ntehnëbu wañi nësëd soje Këris do gë cery sali ña.

33 Gante-wo ka, ale-wo-ale hnë wühnë ñahna asëvalu had umë dënk, do asëval a ntënëna asanu.

6

Vutah gë warëm hni do gë wahnëm hni

1 Vutah, maŵëhnëryinëhni warëmun gë wahnëmun hn'ibëmënkël g'Ahwëhn, kabi watac satëk.

✧ 5:31 5.31: Wapëgwala 2.24

2-3 «Dënënëryihni rēmuh gē hnēmuh gante nuŷandu uhnatah do wafac waŷaryah nkal li.»✧
Rac ye akwēda ndēnkwēryēnkw nte lehnēkēfu ale wāwēhnēk nuŷad ufērēn.✧

4 Wuhnē, warēm, antē alavēbehnuni vutah hun, bare kwēdēryinēhni hn'usatah do hn'uhnira le wātik hnē Ahwēhn hna.

Vēramp gē vēle hwēhnēkēhni

5 Vēramp, mawēhnēryinēhni vēle hwēhnēku nkal li g'untēnah do g'ībal, gē ntaŷary pacah, had Kēris ryokuŷēhnēdun;

6 Dokuŷeryin, hara gena had vēle yēkēlehnēd vahnē va nēŷēhni gē vēhni ma kabi njēkaderun, bare had vēramp Kēris, vēle lid gē vintawāry vidēw hni ile űad Wēnu űa.

7 Dokuŷēhnēryinēhni gē ntaŷary pērēn, had Ahwēhn a dēnk ryokuŷēhnēdun, gena vahnē.

8 Njētērun ale-wo-ale lik ufērēn, Ahwēhn a mbēsādēha, nke aramp ma gena aramp.

9 Do wuhnē, vēhwēhn hni, diryēnēhni koyēna vēle ryokuŷēhnēdēhu va. Tavēryin dakēna: njētērun, ale hwēhnēku űa, wuhnē gē vēhni, mbin hna nke do dēbēndēlehnēlihna vahnē va.

Wēt Ikwētahn

10 Soŷe fuhnahnu, yēkēlehnēryin fanka hun fa hnē fanka űaŷah Ahwēhn hna.

11 Cudaryin viwēta Wēnu űa soŷe aholu ayawēnawu hnē warēnd Sintani hna.

12 Kabi gena vahnē wētaryēden, bare wafanka wayir waŷeh hnē mbin hna, gē vēsankaf,

✧ 6:2-3 6.2-3: Icahn 20.12a

✧ 6:2-3 6.2-3: Icahn 20.12b

gë wafanka do gë vële hwëhnëk duniya wëhwëryah.

¹³ Soŋe umë ye, tëfëka asudawu viwëta Wënu va fop, danko awëkawu hnë fac ile njihahnid wëh hna do, age puhnarun rac, awowu ahahnëndawu.

¹⁴ Kahnëndaryin, ñëbaryin toña ya had ryl sah li, cudaryin usatah wa had cud mëta wët nte huvëd sakahn;

¹⁵ do përyaryin had wapary ina afëyahnu Wanës Wakasëk yam ya.

¹⁶ Nufëryin kwëlëkwël kaka ikwëtahn ŋa, umë ryemadëhu aryipehnu fop wëca wante pëdëk Sintani.

¹⁷ Nuÿaryin ipëh Wënu ŋa nte ye had apënkwyëhwëra do wanës Wënu ŋa had sëlame le njëdahnëk Iyir Ipacah ina.

¹⁸ Tëyëryina Wënu ŋa hnë wayëfa hun hna. Ha, yëfaryindën wati-wo-wati, gë uryema Iyir ina. Antë ahnamawu do kahnëndaryin kwëlëkwël. Yëfaryin soŋe bulunda Wënu ŋa fop,

¹⁹ soŋe ami fënali: arabi wanës ŋa nke hnë wës mën soŋe fëyahnu hara dakëlohna hn'ile sowik hnë Wanës Wakasëk hna.

²⁰ Acëdifu kabi ale fëyahnëd Wanës Wakasëk wac Wën hna yebu. Yëfaryin danko wëku fëyahnu Wanës Wakasëk ŋa, hara dakëlohna, gante tëfëka ka.

Simpaÿi rëkwa

²¹ Ñadëfu ayëtu wuhne fëna, ile fabiko ya do ile lidëfu ya; Tisik, aÿënta fu ale

ÿahnik, aryokuñëhn Ahwëhn a ale hahnëndak, njëtëndanédfëhu fop.

²² Soñe umë fayëryidëfuha pëyawu bi hak nkoḡun do mbosëvosehnu.

²³ Arabi Wënu ña Rëm fu ÿa do Ahwëhn fu Yesu Këris njëdanihëhni fop vëÿënta fu va yam ÿa do g'inqahn, gë kwëtahn ña.

²⁴ Arabi Wënu ña ndëwahni fop vële ÿahnëka Ahwëhn fu Yesu Këris va g'inqahn nte wok cëmëdina!

Wamey
Wamey: Vikerëh Vikasëk Wën gë Wapëgwala (New Testament+)

copyright © 2018 Wycliffe Bible Translators, Inc.

Language: Wamey

Contributor: Wycliffe Bible Translators, Inc.

All rights reserved.

2025-04-30

PDF generated using Haiola and XeLaTeX on 30 Apr 2025 from source files dated 1 May 2025
f961026b-f72f-5bd7-9f75-efa7f932577e